


„Groot Suffenstra” yn it Hôflân by Grou bibourke troch fam. Rameyer

„Groot Suffenstra” is in moaije kop-hals-romppleats, dy’t as min de sinteldyk lâns riid, foar mei sinnich waer tige ta syn rjocht komt. It wie hwat buiich waer, mar ik makke op myn reis in „zonnige periode” mei. Mei nocht haw ik efkes by in hikke stien nei dizze pleats to sjen.

Op it efterhiem foun ik it ûnderstik fan in âlde spinnekopmole. Eigentlik dochs spitich tocht ik dat dy mole net mear bistiet; hwat hie it dochs goed past by sa’n pleats. Nou die it ûnderstik noch tsjinist as skuorke foar de arbeider dy’t yn in wenwein by de pleats

wenne. Foar my wie it ûnderstik in oantinken oan earder tiden. Ik tink ek net dat dit it plak west is fan de mole; der wie gjin tochtsleat en ek gjin bûtenfeart hwer yn meald wurde koe tichte by.

Ik hearde dat men yn it bûthús dwaende wie mei skrobjen en spieren. Earst mar ris foar sjen tocht ik. It slagge my om myn lûd boppe de stofsûger út to krijen en de boerinne, mefr. Rameyer, kaem by de doar. Ik waerd nei myn boadskip yn ’e hûs frege en efkes letter kaem de boer, de hear Timen Rameyer der ek by. Hy wie mei de



arbeider oan it búthússkrobjen.

Dat is ús dizze maeitiid hwat út 'e hân roun, sa fortelde de boer. Mar wy moasten op tiid oan it meanen en kuilen, en hwat it swierst weaget moat de trochslach jaen. Ek wy hawwe hjir de „Jochum Klazes” raei en dy warskôget om op tiid to wêzen”.

„Jimme witte ek wol hwat jimme dwaen moatte” sei ik „as jo alles sels dwaen wolle mei ien arbeider”. „Ja”, andere de hear Rameyer, „wy hawwe altyd wurk, mar myn heit hat my leard dizze rige: Hwannear men avensearret as men it net drok hat, dan hawwe jo it net sa drok as it drok is en men avensearje moat. Derom skreppe wy altyd mar troch en slagget it ek om op tiid klear to kommen”.

Doe't wy hwat oer de famylje sie-
ten to praten kaem de boerinne mei
in boekje fol foto's op 'e lappen.
„Kijkt u eens”, sei se, „hier heeft
u vier geslachten van mijn mans
kant, en hier heeft u vier geslach-
ten van mijn kant, en deze acht zijn
allen nog in leven”. Mefr. Rameyer
praet Stellingwerfs; dêr komt de
famylje wei.

Dit foun ik prachtich moai. Wy
sloegen noch ien blêd om en der kae-
men se alle acht by elkoar, lykas
bygeande foto sjen lit.

De fjouwer geslachten Rameyer
wiene

Timen Rameyer, 88 jier, wennet yn Ljouwert.

Gerrit Rameyer, 60 jier, wennet yn Wolvegea.

Timen Rameyer, 32 jier, boer Höf-



Boppeste rige fan lofts nei rjochts Elizabeth Heida - Timen Rameyer Jr. en Hiltje v. d. Wal; ûnderste rige: Gerrit Rameyer Sr. - Gerrit Rameyer Jr. - Timen Rameyer Sr. - Hiltje Rameyer en Elizabeth Oosting.

lân Grou.

Gerrit Rameyer, 6 jier, wennet yn Grou

De fjouwer geslachten fan vrou Rameyer wiene

Elizabeth Oosting, 93 jier, Wolvegea.

Hiltje v. d. Wal, 63 jier, Oldelamer.

Elizabeth Heida, 42 jier, Grou.

Hiltje Rameyer, 7 jier, Grou.

Twa kear fjouwer geslachten, hwat in rikens dit to hawwen, mar ek 2 kear fjouwer geslachten forboun aan de Fryske boerestân. Ik foun it tige moai en haw dêrom der plak foarjouw yn dit artikel. Meastal giet it dan in it foarste plak om de pleats, nou haw ik de minsken hwat mear nei foaren helle.

Nije wike mear oer „Groot Suffenstra.”

d. H.

„Groot Suffenstra” is in moaijke kop-hals-romp pleats, sa as ik foarige wike al skreau. By de pleats wurdt 28 ha lân brûkt. Hjirfan leit noch 8 ha by hûs en de oare 20 ha binne skaet troch de nije forkearswei en de spoardyk.

„Foar ús jildt itselde as foar de fam. De Haan op „Klein Suffenstra”, sa fortelde de hear Rameyer, „it is tige lestich”.

Troch yntensyf weidzjen en rûme bidonging is it mûglik in 40 melke kij to hâlden”, sa fortelde de hear Rameyer fierder.

Op myn fraech, binne jo fokker, krike ik ta andert: „Ja, hwat sil ik der fan sizze, de ynkomen forwachtsje wy út it molkpûdtsje mar ik prebearje wol troch goede KI-bollen myn bislach fé foarút to bringen”.

Doe't ik sei dat neffens floreenkohieren dizze pleats foarhinne greater west hie, wie de hear Rameyer dat mei my iens.

„Sa as it nou is lizze de nammen forkeard,” sei hy. „Dan hie de pleats fan De Haan, „Groot Suffenstra” wêze moatten en dy fan ús „Klein Suffenstra”. Mar it measte lân dat nou brûkt wurdt troch buorman O. Castelein hat foarhinne by dizze pleats west”.

Sa sieten wy noflik to praten. Hoe't it foarhinne west hic mei eigners en brûker koe de hear Rameyer net fortelle.

„Us heit (de hear Gerrit Rameyer) hat yn 1949 de pleats kocht en yn 1949 binne wy hjir kommen to wenjen”. 1957

Dat wy, dat binne dan de hear Timen Rameyer en Elizabeth Heide, beide Weststellingwervers. Soks merkbyt men wol oan harren tael. De boerinne hâldt alhiel fêst oan har memmetael, de boer prætte Frysk mei my, mar ik tink dat de hûstaal noch Stellingwerfs is. En gelyk hawwe se, as alle Friezen ek sa oan harren tael fêsthâldden dan soe foar it biwarjen derfan wis min-

der noed wêze.

Doe't G. Rameijer de pleats kocht buorke Gooitsen Deelstra en Boukje Vervat der, dy hawwe der fan 1946-1957 wenne. Foar 1946 wie it Eise Bouma en yn myn bernejieren buorke hjir de famylje De Groot. De lêsten hjirfan wiene Pier de Groot en Anna Sterkenburg. Dizze hawwe der oant 1935 ta buorke. Foar Pier de Groot wie it Klaas de Groot, hoeneear dy der kommen binne kin ik net krekt sizze, mar dêrfoar hat der noch in fam. Witteveen buorke.

Yn 1852 wie de pleats eigen oan Jetske Wiskia van Scheltinga en buorke Eeltje Johannes Huisman der. De pleats wie doe 120 pounsmiet, hie ien stins en kaem foar under it floreernûmer 30 fan Grou.

Mar dêr oer nije wike. d. H.

Neffens de floreenkohieren fa Grouw komt Groot Suffenstra der yn foar by nû 30 en yn de stimkohieren fan itselde doarp mei ien stim op it selde nûmer.

Eardere eigeners en brûkers hawwe west:

1640 Schelte van Abbema en Wybe Douwes en syn susters bern. De pleats wie doe 140 pounsmiet.

1698 Old Grytman Valerius Glinstra tot Coanjum eigener. Hotze Gerrijts brûker.

1708 As yn 1698.

1718 Old Collonel C. v. Scheltinga eigener. Hotze Gerrits Widd. brûkster.

1728 As yn 1718.

1738 A. C. v. Scheltinga eigener, Bysitter Hoitema brûker.

1748-1778 Grytman v. Scheltinga eigener, Jelmer Durks brûker.

1788 As yn 1778.

1798 As yn 1788

1818 J. v. Scheltinga-Widd. J. C. Bergsma, eignerske, Eeltje Jelmers Huisman brûker.

1828 J. A. Laatsma eigener, Eeltje Jelmers Huisman brûker.

1838 As yn 1828.

1848 Jetske Wiskia v. Scheltinga eignerske, widd. Eeltje Jelmers Huisman brûkster.

1858 Anna Catharine de Vries, Widd. Rients Rijpma eignerske, selde widd. brûkster.

Oant safier de floreenkohieren.

Nou buorkje der de hear en mefrou Rameijer (sjoch eardere artikels). Wy winskje harren ta dat de bân mei Groot Suffenstra sa wurde mei dat der ek noch ris in foto pleatst wurde kin fan fjouwer geslachten forboun mei deselde pleats.

d. H.